

San Pablobi

GALACIA

Bainni utire toyani saobi

Saludo

1 ¹Yë'ë, Pablo hue'eguëbi Riusu ta'yejeiye yo'o conguë ba'iguë'ë. Ja'nca ba'iguëna, bainbi yë'ëre gare cuencueni raomaë'ë. Bainbi yë'ëni coca gare ye'yomaë'ë. Mai Ējaguë Jesucristo, mai Taita Riusu, bacuabi yë'ëre cuencueni raoni, yë'ëni coca ye'yohuë. Jesucristobi junni tonguëna, Taita Riusubi baguëte huajëguëte re'huabi. Ja'nca re'huaguëbi yë'ëre cuencueni raoni, baguë ta'yejeiye yo'o conguëre yë'ëre re'huabi. ²Yureca, yë'ë, yë'ë gaje bain Cristo bain naconi, yëquënabi ënjo'onre ba'ijën, mësacua Cristo bain Galacia yijare ba'i jubëan si'acuani utire toyani saoyë yëquëna. ³Mai Taita Riusu, mai Ējaguë Jesucristobi mësacuani ai oire bani conjën, mësacuani ai recoyo bojo güeseye masiyë. ⁴Mai Taita Riusubi cuencueni raoguëna, Jesucristobi mai gu'a jucha zemosi'ajëguëte re'huabi. Ja'nca re'huaguëbi yë'ëre cuencueni raocuana ti'anni, Riusubi si'nsema'ija'guë caguë, mai jëayete ëñobi. Mai gu'a jucha ro'ire junni tonguëna, Riusu bainreba si'arën ba'iye poreyë mai. ⁵Ja'an ta'yejeiye Ējaguë Riusu ba'iyete gare caraye beoye bojo cocare cajën bañuni.

No hay otro mensaje de salvación

⁶Riusubi mësacuani ai oire baguë conza caguë, Cristo ba'iyete mësacuani ëñoni, Cristo bain ba'iye mësacuare choiguëna, mësacuabi achahuë. Ja'nca achani ba'icuabi yureca teuaguëbi yë'ëre cuencueni rao'e jëana baguëte jo'cani senjojëna, gue ro'taye beoye sa'ntiyë yë'ë. Yequëcuabi tin ma'are ro coquejën ëñojëna, mësacuabi ja'an ma'aja'an ganini, Riusu bain ruiñu cajën, bacua coca quëani achose'ere te'e jëana achani yo'ohuë. ⁷Riusu bain

ba'iyē yētoca, tin ma'abi sani ti'añe gare porema'iñē. Cristoni si'a recoyo ro'taye se'gabi Riusu bain ba'iyē poreyē mai. Yequēcuaabi mēsacuana ti'anni, tin cocare ro hui'ya yihuojën, tin ma'are ëñojën, ro coqueye se'ga ba'iyē bacua. ⁸Yëquënabi mēsacuana ti'anni, Riusu cocarebare mēsacuani quëani achojën, Riusu bain ba'iyē te'e ruiñe cani achohuë. Yequēcuaabi mēsacuana ti'anni, Yëquëna jubë bain ba'iyē cajën, o Riusu coca cacua ba'iyē cajën, tin quëani achotoca, Riusu bënni senjoñe se'ga ba'lji bacuare. ⁹Ganreba caguë, ai bëiñe si'a jëja yihuoguë, mēsacuani se'e quëayë yë'ë. Yequēcuaabi mēsacuana ti'anni, yëquëna quëani achose'le'ru tin cocare quëani achotoca, Riusu bënni senjoñe se'ga ba'lja'guë bacuare, cayë yë'ë. ¹⁰Ja'nca caguëbi yequēcua case'le'ru yo'oma'iguë, ro bain re'oye ëñañe gare ro'taye beoye ba'iyë yë'ë. Riusu re'oye ëñañe se'gare ëjoguë, baguë yo'o case'ere yo'oguë ba'iyë yë'ë. Ro bain re'oye ëñañete ro'tatoca, Cristoni yo'o conguë gare beore'ahuë yë'ë.

Cómo llegó Pablo a ser apóstol

¹¹Yureca, yë'ë bain sanhuë, ën cocare mēsacuani quëani achoguëna, mēsacua achani ye'yëj'ën. Yë'ë yua Riusu cocarebare quëani acho bi'raguëna, ro bain ye'yose'le gare beobi. ¹²Ja'an cocare ye'yeto, ro bain yihuoni ye'yoyete gare senmaë'lë yë'ë. Riusu ye'yoye se'gare senguëna, Jesucristobi baguë cocarebare yë'ëni masi güeseguë, guënamëbi na'oni yë'ëni cuencueni ëñobi.

¹³Yë'ë ja'anrë yo'oguë ba'ise'le, judío bain naconi bacua Riusu cocare ye'yeguë ba'iguëna, mēsacua masiyë. Cristo bain jubëanre gare huesoni si'aza caguë, bacua ñë'casiruanna ti'anni, ai coca neni, bacuani ai je'o baguë ba'nhuë yë'ë. ¹⁴Judío ira bain ba'isi cocare ye'yeni masito, yë'ë gaje bain ye'yeye'ru quë'rë ai ba'iyē ye'yeni masiguë ba'nhuë yë'ë. Yë'ë ira bain ba'isi'cua yo'ojën ba'ise'le'ru te'e ruiñereba yo'ozca caguë, ba cocare ai ye'yeni masiguë ba'nhuë yë'ë. ¹⁵Ja'nca ba'iguëreta'an, Riusubi yë'ë t'ëya raisirën quë'rë ja'anrën yë'ëre cuencueni, yë'ëni ai yëreba yëguë, baguë yo'o conguë ba'lja'guëre yë'ëre re'huabi. ¹⁶Ja'nca re'huani, ba'iguë ba'iguë, baguë Zin Jesucristote yë'ëni bojoguë ëñobi. Judío bain jubë ba'ima'icua sana, Cristo ba'iyete bacuana quëani achoj'ën caguë, Jesucristote yë'ëni ëñobi. Ja'nca ëñoguëna, bain masicuani yihuo cocare senmaë'lë yë'ë. ¹⁷Cristo ta'yëjeiye yo'ore concua, yë'ë re'huase'le'ru quë'rë ja'anrë re'huasi'cua, Jerusalén huë'le jobo ba'icua, ja'ancuana yihuo cocare senni achaguë saimaë'lë yë'ë. Ja'nca saima'iguëbi Arabia yija re'otona sani, ja'anruna bëani, Riusu naconi te'e caguë baë'lë yë'ë. Ja'nca ba'iguë, ja'nrebi jë'te, Damasco huë'le jobona se'e goë'lë yë'ë.

¹⁸Goni, ja'nrebi samute tëcahuëan bani, Jerusalenna sani, Pedroni ëñajaë'lë. Eñajani, baguë naconi quince umuguseña se'ga bëani baë'lë.

19 Ja'nca ba'iguë, Pedro, yequë Santiago, mai Ējaguë Jesucristo yo'jeguë, ja'an samucua se'gani ëñahuë yë'ë. Yequëcua Cristore ta'yejeiye yo'o concuani ëñamaë'ë yë'ë. 20 Riusubi yë'ë recoyote ëñaguëna, mësacuanu gare coquemai'ñë yë'ë. Te'le ruiñe se'gare mësacuanu toyani saoyë. 21 Bacuare ëñani tējini, ja'nrebi Siria, Cilicia, ja'an yija re'otoñana saë'ë yë'ë. 22 Cristo bain Judea yijare ba'ijën, yuta yë'ëre huesëjën baë'ë. Yë'ë ba'iyete achaye se'ga ba'ijën baë'ë. 23 Yequëcuabi yë'ëre quëajën: "Ja'anguëbi maini ai je'o bani, Cristoni recoyo ro'taye gare jo'cani senjojë'ën casi'quë, ja'anguëbi yureña Cristoni si'a recoyo ro'ta cocare bainni quëani achoguë ganiji" ja'anre quëajëna, 24 Cristo bain Judea yija ba'icuabi yë'ë ba'iyë mame re'huase'ere ro'tajën, Riusu ta'yejeiye ba'iguëni ai bojojën cahüë.

Los otros apóstoles aceptan a Pablo

2 1 Cristore ta'yejeiye yo'o concuani ëñani tējini, ja'nrebi catorce tëcahuëan bani, Jerusalén huë'e jobona se'e saë'ë. Bernabé naconi saiguë, Titore'ga sahuë yë'ë. 2 Riusubi yë'ëre saiye guansequëna, Jerusalenna saë'ë yë'ë. Sani ti'anni, ru'ru Cristo bain ëjacua naconi yahuera'rë ñë'cani, Riusu cocareba quëani achoye, ja'anre bacuani te'le ruiñe quëahuë yë'ë. Yequërë bacuabi yë'ë quëani achoguë ganise'ere gu'aye ro'tatoca, yë'ëbi judío bain jubë ba'imal'icuanu Riusu cocarebare quëani achoguëna, yë'ëni ëñema'ñe caguë, ja'an ganiguë quëani achoguë ba'iyete ëja bainni te'e ruiñe quëahuë yë'ë. 3 Ja'nca quëaguëna, bacuabi yë'ë yo'o yo'ogüë ganiñete re'oye ëñani bojohüë. Bacuabi Titore ëñajën, baguë griego bainguë ba'iyete masicuata'an, baguëni go neño ga'nire tøyoye guansemaë'ë. 4 Ja'an se'gare guansetoca, gare güeye beoye yo'ore'ahuë. Yequëcuaca yëquëna ñë'casirute ba'ijën, go neño ga'nire tøyoye guansejën, si'a Moisés coca toyani jo'case'ere'ga bacua yo'oye'ru güina'ru yo'oye guansehuë. Ja'nca guansejëna, Titoni go neño ga'ni tøyoye gare yo'omaë'ë yëquëna. Ja'an guansecuabi ro coquejën ro yahue cacasi'cua baë'ë. Mësacua ro'taye'ru Cristoni si'a recoyo ro'tayë yëquëna cajën, yëquëna jubëna ti'anhuë. Ti'anni, maibi Cristoni recoyo te'e zil'inni bojojëna, bacuabi ro ëña rani, ¿Queaca Moisés coca toyani jo'case'ere bacuani yo'o güeseye'ne? cajën, maini ai rëquëye yo'o güeseyete ro'tahuë. 5 Ja'nca ro'tajëna, bacua guanse'ere gare yo'oye beoye baë'ë yëquëna. Yo'otoca, mësacua'ga ba coca guanseye'ru güina'ru yo'oye ba'ire'ahuë. Yëquënabi mësacuana sani, Cristo ba'iyete quëani achojën, Cristoni si'a recoyo ro'tani Cristo bain ba'ijë'ën quëani achojën ba'isi'cuabi mësacua tin yo'oye gare yëmaë'ë yëquëna.

6 Bacua guanse'ere yo'omajëna, Cristo bain ëjacua cuencuesi'cuabi achanu, yëquëna yo'oye yëse'le'ru tin yo'oye guansemaë'ë. Guansetoca, bainbi bacuani

re'oye ëñani yo'ore'ahuë, Cristo bain ëjacua sëani. Cristo bain ëjacuabi Riusu yëye'ru tin guansetoca, yë'ë'ga re'oye ëñama'ire'ahuë, Riusubi ro bain ta'yejeiye ba'iyete ëñama'iguë sëani. ⁷Bacua yua yëquëna case'ere achajën, yëquënani tin yo'oye guansema'ë. Bacuabi yë'ë ba'iyete ëñajën, yë'ë yo'o yo'oyete re'oye cahuë: “Riusubi më'ëni cuencueni re'huaguëna, judío bain jubëna sani Cristo ba'iyete quëani achoye guanseni saobi” cahuë. ⁸Ja'nca saoguë, mai ta'yejeiyereba Riusubi Pedroni ta'yejeiye yo'o güesey masiguë, yë'ëre'ga re'huani, judío bain jubë ba'ima'icuaana saoni, yë'ëre'ga güina'ru ta'yejeiye yo'o güesey masiji.

⁹Ja'nca masiguëbi yë'ëni ai ta'yejeiye conni, yë'ëni ai re'oye yo'o güeseguëna, Cristo bain ëjacua casi'cua, Santiago, Pedro, Juan hue'ecua, ja'ancuabi yë'ëre ëñani, Riusu cuencuese'ere masini, yë'ëni recoyo te'e bojojën, yë'ëni re'oye cahuë: “Maibi yua Cristoni te'e conjën ba'icua'ë. Më'ëbi judío bain jubë ba'ima'icuaana sani congüëna, yëquënabi judío bainna sani conjënna, maibi Cristoni te'e conjën ba'icua'ë” cajën, yë'ëre, Bernabëre re'oye ëñajën, yëquënani recoyo te'e bojohuë. ¹⁰Ja'nca cani tonni, ñaca'ga yihuohuë: “Si'a Cristo bain bonse beo hua'na ba'ijënna, bacuani conreba conjën ba'ijë'ën” cahuë bacua. Ja'nca cajën yihuojënna, yë'ëbi Ja'ë. Ja'nca jo'caye beoye yo'ojën bañuni caguë shehuohuë yë'ë.

Pablo reprende a Pedro en Antioquía

¹¹Ja'nca te'e bojojën ba'icuata'an, jë'te, Pedrobi Antioquía huë'e jobona ti'an rani gu'aye yo'oguëna, baguëni bëin coca caye bahuë yë'ë. ¹²Judío bain jubë ba'ima'icuaana ti'an rani, bacua naconi te'e ainguë ñu'iguë baji'i baguë. Ja'nca ba'iguëbi, ja'nre'bi Santiagore concuabi Jerusalemni rajjënna, Pedro yua judío bain jubë ba'ima'icua naconi aon aiñe jo'cani, bacua ainruna se'e në'camaji'i. Judío bain ëñani yë'ëni bëinma'iñe caguë, ja'nca yo'obi Pedro. ¹³Ja'nca yo'oguëna, yequëcua judío bain baru ba'icuabi Pedro yo'ose'ere ëñani, güina'ru Santiagore concuani huaji yëjën, Pedro yo'ose'e'ru güina'ru quëñëhuë. Ja'nca huaji yëjën yo'ojënna, Bernabë'ga güina'ru huaji yë äaye baji'i. ¹⁴Ja'nca yo'ojënna, yë'ëbi ti'an rani ëñato, Cristo cocareba ye'yese'e'ru te'e ruiñe yo'omajën ba'ë bacua. Ja'nca ba'ijënna, yë'ë yua Pedrona bonëni, si'acua achajënna, bëin coca baguëni cahuë yë'ë: “Më'ë yua judío bainguë ba'iguëbi judío bain yo'ojën ba'ise'ere jo'cani, tin bain yo'ojën ba'iyë'ru yo'oni, ja'nre'bi te'e jëana bonëni bacua yo'oye'ru yo'oye jo'cani, judío bain yo'oye'ru se'e yo'o bi'rahuë më'ë. Ja'nca bonëni yo'oguë, gu'aye yo'ohuë më'ë. Ja'nca yo'oguëna, judío bain jubë ba'ima'icuaabi më'ë yo'ose'ere ëñani, judío bain yo'oye'ru yo'o bi'ratoca, coque güeseyë bacua” Pedroni caguë bën'ë yë'ë.

Los judíos y los no judíos alcanzan la salvación por la fe

¹⁵Yureca, mai jubë bain judío bainreba cacuabi Riusu bain ba'iyë yëjën, tin bainre ëñani, Gu'a bain'ë bacuare cajën ba'iyë. ¹⁶Ja'nca cajën ba'icuabi ëñere masiyë: Moisés ira coca toyani jo'case'e'ru te'e ruiñe yo'ojën, Riusu bain ruiñe gare porema'iñë mai. Jesucristoni si'a recoyo

ro'taye, ja'an se'gabi Riusu bainre re'huasi'cua ba'iyē poreyē mai. Mai'ga Jesucristoni si'a recoyo ro'tajēna, Riusubi mai ba'iyete ēñani, mai gu'a juchare saoni senjoni, mai recoyo mame re'huani, baguē re'o bainrebare maire re'huani baji. Mai hua'na se'gabi Moisés ira coca toyani jo'case'ru yo'oni Riusu bain ruiñe gare porema'icua ba'iyē. Si'a bainre cato, bacuabi si'a Moisés guansesi cocare te'e ruiñe yo'oni, Riusu bain ba'iyē yētoça, ai caraji bacuare.

¹⁷Yureca, mai hua'nabi yua Jesucristoni si'a recoyo ro'tani, Riusu bain re'huasi'cua ba'iyē yējēn, çyequērē judío bain jubē ba'ima'icua ba'iyē'ru gu'a bain ba'ima'iñe mai? Ja'nca ba'itoca, yequēcuabi mai ba'iyete ēñani, Cristobi bacuare gu'aye yo'o güesemaquē cama'iñe bacua. Ja'nca cacuata'an, gare gu'aye yo'o güesema'iji baguē. ¹⁸Yureca, yē'ē yua judío bain yo'ojēn ba'ise'ere jo'cani senjosi'quēbi se'le yo'oye ro'tatoca, si'a bainbi yē'ere ēñani, yē'ē gu'aye yo'oguē ba'ise'ere masiyē. ¹⁹Ja'an yo'oguē ba'ise'ere gare jo'cani senjohuē yē'ē. Moisés ira coca toyani jo'case'ru yo'oni, Riusu naconi si'arēn ba'iyē ro'taguē ba'isi'quēbi ja'nca'ru gare se'le ro'tama'iguē ba'iyē yē'ē. Riusu yēyete te'e ruiñe yo'oza caguē, Moisés ira coca toyani jo'case'ere te'e ruiñe yo'oye gare jo'cani senjohuē yē'ē. ²⁰Yē'ē yua Cristo ba'iyete ēñato, baguē yēyete gare jo'caguēbi mai jucha ro'ire junni tonguē rajli. Yē'ē'ga yē'ē yēye se'gare gare jo'cani senjoni, Cristo yēye'ru yo'oye se'gare yo'oza caguē ba'iyē yē'ē. Ja'nca ba'iguēna, Cristobi yē'ē naconi te'e ba'iguē, yē'ere ta'yejeiye conguē ba'iji. Ja'nca ba'iguēna, yē'ē yua si'a ēn yija ba'i umuguseña Riusu Zin Jesucristoni si'a recoyo ro'taguē, baguē yo'o se'gare yo'oyē yē'ē. Yē'ere ai yēguēbi yē'ē gu'a jucha ro'ire junni tonguēna, ta'yejeiye ai recoyo huajēguē, baguēni te'e conguē ba'iyē yē'ē cayē. ²¹Ja'nca ba'iguēbi Moisés ira coca toyani jo'case'ere yo'oni Riusu bainguē runza caye gare yēma'iñē yē'ē. Ja'nca cani yo'otoca, Riusu caraye beoye coñete jo'cani senjoñē. Moisés ira coca toyani jo'case'ere yo'oni Riusu bain ruiñe poretoça, Cristo junni tonse'ebi mai gu'a jucha ro'iyē beoye ba'iji.

La ley o la fe

3 ¹Yureca, yē'ē bain sanhuē, Galacia huē'le jobore ba'icua, ai huesē çaye ba'icuaireba ba'iyē mēsacua. Yēquēnabi mēsacuana sani Riusu cocarebare quēani ahojēn, Jesucristo junni tonse'ere te'e ruiñereba mēsacuani ye'yojēna, mēsacuabi achani, re'oye ye'yehuē. Ja'nca ye'yesi'cua ba'ijēn, çqueaca coque güesere'ne? Yequēcuabi mēsacuana ti'anni, zupai huatibi coqueguēna, çmēsacuani tin ro'ta güesere? ²Mēsacua yua Riusu Espiritute coni basi'cuabi çmēsacua Cristoni si'a recoyo ro'taye gare huanē yere? Huanē yema'itoca, çqueaca ro'tajēn, Moisés ira coca toyani jo'case'ere yo'oni Riusu bain ruiñe çajēn

ro'tare'ne? ³ iAireba huesë äaye ba'icua ba'iyë mësacua! Riusu Espíritubi mësacuana gaje meni baguëna, mësacuabi Riusu coñete te'e ruiñe masihuë. Ja'nca masicuata'an, ¿Mësacua queaca ro'tajën, ro ën yija ba'iyete ye'yeye se'le bonëni zi'inre'ne? ⁴ Riusu Espiritu conguë ba'ise'ere ro'tajë'n. Mësacuabi ai yo'ojën, Riusu Espiritubi mësacuani ai ta'yejeiye coñereba conguëna, ¿mësacua guere yo'ojën baguë coñete ro jo'cani senjoni, tin ye'yose'ere zi'inre'ne? ¿Riusu Espiritu conse'ere ro ye'yere? Ja'anre ro'taye yëma'inë yë'ë. ⁵ Mai Èjaguë Riusubi mësacua jubëna ti'anni, baguë Espiritute mësacuana jo'cani, mësacuani ai ta'yejeiyereba yo'oni ëñobi. Ja'nca ëñosi'quëbi, mësacua ira coca toyani jo'case'ere te'e ruiñe yo'ojënna, ¿mësacuani bojoguë conguë baquë baguë? Banbi. Mësacuabi Jesucristoni si'a recoyo ro'tajënna, Riusubi mësacuani bojoguë conguë bajji'i.

⁶ Riusuni si'a recoyo ro'taye masiye yëtoca, ira taita ba'isi'quë Abraham ro'taguë ba'ise'ere ro'tani ye'yejë'n. Riusubi baguëni coca cani jo'caguëna, Riusu te'e ruiñe yo'oja'yete si'a recoyo ro'taguëna. Ja'nca ro'taguëna, Riusubi baguë ba'iyete ëñani, baguë re'o bainguëte re'huanu baguëna. ⁷ Ja'nca baguëna, si'a bainbi Riusu re'o bain ba'iyë poreyë. Riusubi coca cani jo'caguëna, Riusu te'e ruiñe yo'oja'yete si'a recoyo ro'tatoca, Riusubi baguë re'o bainre bacuare re'huanu baguëna, Abraham ba'iyë'ru güina'ru ba'iyë poreyë. ⁸ Riusubi Abraham naconi coca caguë, baguë yureña yo'oja'yete ro'tani, Abrahamni quëaguëna: “Më'ë yua yë'ë cocare si'a recoyo ro'taguëna, si'a ën yija bain jubëanni bojo güeseja'guë'ë yë'ë” caguë quëaguëna. ⁹ Ja'nca quëani jo'caguëna, yureña bain Jesucristoni si'a recoyo ro'tajën ba'icua, ja'ancuabi Riusu re'o bain ba'iyë. Riusubi taita Abrahamni re'oye yo'oni bojo güesequë, yureña bainre'ga güina'ru re'oye yo'oni, bacuani bojo güeseji.

¹⁰ Yureca Moisés ira coca toyani jo'case'ere te'e ruiñe yo'oni Riusu re'o bain ruiñe ro'tatoca, Riusubi maini bojoguë coñe beoye gare ba'iji. Maini bënni senjoñe se'ga ba'iji. Riusu coca toyani jo'case'ere ëñato, ñaca caji: “Moisés ira coca toyani jo'case'ere te'e ruiñe yo'ozca catoca, ba coca guansese'le si'ayereba te'e ruiñe achani yo'oye bayë bain hua'na. Te'e ruiñe yo'oma'itoca, Riusubi bacuani bënni senjosi.” ¹¹ Ja'nca cani jo'case'ere ba'iguëna, bainbi ba ira cocare te'e ruiñe yo'oni Riusu re'o bain ruiñe ro'tatoca, Riusubi bacuani re'oye ëñañe beoye ba'iji. Riusubi ñaca'ga cani jo'cabi: “Yë'ë case'ere te'e ruiñe yo'oja'yete si'a recoyo ro'tajën ba'itoca, yë'ëbi mësacuare yë'ë re'o bainre re'huanu bani, mësacuani si'arën ba'i güese'yë.” Ja'nca cani jo'casi'quëbi güina'ru yo'oja'guë'bi. ¹² Yequëcuabi Moisés ira coca toyani jo'case'ere te'e ruiñe yo'ozca cajënna, yequëcuabi Riusu yua baguë case'ere te'e ruiñe yo'oja'guë'bi cajënna, gare te'e caye beoye ba'iyë bacua. Moisés coca toyani jo'case'ere, ja'ansi cocare ëñato,

ñaca caji: “Bainbi Moisés coca toyani jo'case'ere te'e ruiñe yo'oni Riusu re'lo bain ruiñe ro'tatoca, ba coca guansese'e si'ayereba te'e ruiñe yo'oye bayë bacua” caji.

¹³Ja'nca toyani jo'case'e ba'iguëna, maibi ja'an cocare ëñani, Riusu bënni senjoja'ñete masiye poreyë. Ja'nca masiye porecuabi Cristo junni tonse'ere ro'tani, mai gu'a jucha yo'ojën ba'ise'e ro'ire junni tonguëna, mai jëayete masiye poreyë. Ja'nca junni tonsi'quëbi mai gu'a jucha ro'ire bënni senjosi'cua ba'ima'ija'bë caguë, mai jëayete re'huabi. Moisés ira coca toyani jo'case'e'ru güina'ru yo'obi Jesús: “Si'acua gu'a jucha ro'ire crusu sa'cahuëna reoni senjosi'cua, ja'ancua yua Riusu bënni senjosi'cua ba'iyë” toyani jo'case'e ba'iji. ¹⁴Ja'nca toyani jo'case'e ba'iguëna, Riusu yua bain jucha ro'ire bacuani bënni senjoñe ro'taguëbi si'a bain jëayete masi güesebi. Judío bain, judío bain jubë ba'ima'icua, si'acuabi Cristo junni tonse'ere ro'tani, yë'ë bënni senjoja'ñete jëani, yë'ë naconi gare ju'iñe beoye ba'ija'bë caguë, Cristoni junni toñe maina raobi. Baguë re'oye yo'ojai coca Abrahamni cani jo'case'e'ru, Riusu Espíritute coní baye poreyë mai.

La ley y la promesa

¹⁵Yureca, yë'ë bain sanhuë, Riusu coca Abrahamni cani jo'case'ere te'e ruiñe masiye yëtoca, bonse ëja bain yo'ojën ba'iyete ro'tani ye'yej'ën. “Yë'ëbi junni huesëja'yete ro'taguë, yë'ë bonsere coní baja'cuare caní jo'caza” caguë, ba cocare te'e ruiñe toyani, bain ëjaguëna jo'cayë bacua. Ja'nca caní jo'cani, ja'nre'bi junni huesëguëna, bain ëjaguëbi baguë coca toyani jo'case'ere'ru güina'ru yo'o güeseji. Tin yo'oye yëcua ba'itoca, bacuare ënseji. Ba ëjaguë toyani jo'case'e'ru tin yo'oye gare porema'iñë caguë ënseji. ¹⁶Riusu yua Abrahamni re'oye yo'ojai cocare caní jo'caguëna, yequëcuabi tin yo'oye gare porema'iñë. “Më'ë bainguë zoe raija'guëbi si'a ën yija bain jubëanre choini, yë'ë bainre bacuare re'huaja'yete masi güeseja'guë'bi” Abrahamni caní jo'cabi Riusu. Ja'nca caní jo'casi'quëbi “Më'ë bain zoe raija'cua” camajil'i. “Më'ë bainguë zoe raija'guë” cabi. Ja'nca cato, te'eguë se'gare cabi Riusu. Ja'nca caní jo'caguëbi baguë Raoja'guëreba Cristo hue'eguëte cabi. ¹⁷Ja'nca caní jo'caguëna, ahamni re'oye yo'ojai cocare caní jo'caguëna, yequëcuabi tin yo'oye gare porema'iñë. “Më'ë bainguë zoe raija'guëbi si'a ën yija bain jubëanre choini, yë'ë bainre bacuare re'hua Moisés ira coca toyani jo'case'e cuatrocientos treinta tëcahuëan jë'te toyani jo'case'e ba'iguëna, yequëcuabi ja'an cocare ëñani, Riusu caní jo'case'e'ru tin cocare re'huaye gare poremaë'ë. Riusu yua baguë coca yo'ojai'yete caní jo'casi'quëbi gare tin yo'oma'iguë, baguë caní jo'case'ere'ru güinareba'ru te'e ruiñe yo'oja'ye bajil'i. ¹⁸Ja'nca ba'iguëna, yequëcuabi bainre yihuojën, “Moisés

coca ira toyani jo'case'ere te'e ruiñe yo'ojën ba'itoca, Riusu re'o bain ruiñe poreyë mai” cajën, yua Riusu coca canì jo'case'ere'ru tin yihuocua ba'iyë. Ja'nca yihuocuabi “Riusu coca yo'oja'ye canì jo'casi'quëbi gare yo'oma'iji” cajën ba'iyë. Ja'nca cajën ba'icuata'an, te'e ruiñe cama'iñë bacua. Riusubi baguë bain re'huaja'yete Abrahamni canì jo'casi'quë sëani, maibi Riusu re'o bain re'huasi'cua ba'iyë ti'añë mai.

¹⁹Yureca, yë'ëbi Moisés ira coca toyani jo'case'ere mësacuanì yihuoguë, gu'a coca ba'iyë gare cama'iñë yë'ë. Re'o coca ba'iji. Riusubi ja'an cocare Moisesni canì jo'caguë, bain gu'a jucha yo'ojën ba'iyete bacuanì masi güeseza caguë, ja'an cocare Moisesni canì jo'cabi Riusu. “Yë'ë Raoja'guëreba ba'iguëte Abrahamni canì jo'casi'quë, ja'an bainguë zoe raija'guëbi ti'añë tèca, Moisés ira coca toyani jo'case'ere te'e ruiñe yo'ojën ba'ijë'ën” canì, ba cocare Moisesna jo'cabi. Ja'nca jo'caguë, bainni quëani achomaji'i. Ru'ru, baguë anje concuanì quëani achoguëna, ja'nrëbi bacua yua Moisesni quëani achonì jo'cahuë. Ja'nca jo'cajënna, Moisés yua Riusu bainguë cuencuesi'quëbi bainre ñë'coni, Riusu coca guanseni jo'case'ere bacuanì quëani achoguë baji'i. ²⁰Ja'nca ba'iguëna, Riusubi baguë guanse cocare canì jo'cato, ai jai jubë concuabi quëani achohuë. Ja'nca quëani achorena, Riusu coca yo'oja'yete ja'nca'ru jo'camaji'i. Baguë se'gabi baguë bainguë Abrahamni canì jo'cabi.

El propósito de la ley

²¹Yureca, yë'ëbi Moisés ira coca toyani jo'case'ere mësacuanì quëaguë, Riusu coca yo'oja'ye canì jo'case'e'ru tin guansema'iji cayë yë'ë. Riusubi yëtoca, yeque cocare maini guanseye poreji. Guanseguëna, maibi achani te'e ruiñe yo'oni, gare junni huesëye beoye ba'ire'ahuë. Ja'nca ba'itoca, Riusubi mai te'e ruiñe yo'ojën ba'iyete ëñani, maini bojoni, maire baguë re'o bainre re'huani baye poreji. ²²Ja'nca ro'taguëta'an, Riusubi maire ja'nca ëñama'iji. Baguë coca toyani jo'case'ere ëñato, ñaca caji: “Si'a bainbi gu'a jucha yo'ojënna, bacuanì bënni senjoñe bayë yë'ë” cabi. Ja'nca canì jo'casi'quëbi baguë coca yo'oja'yere'ga ro'tani, güina'ru yo'oza caguë ëjoji. Si'a bain Jesucristonì si'a recoyo ro'tacua, ja'ancuare baguë re'o bainre re'huani baji.

²³Ja'nca re'huani baye ro'taguëbi Jesucristote yuta maina raoma'iguë ba'isi'quëbi maini ëñaguë, Moisés ira coca toyani jo'case'e'ru te'e ruiñe yo'ojën ba'ijë'ën guanseguë baji'i. Yë'ë Raoja'guë ti'añë tèca ba guanse cocare yo'ojën ba'ija'bë caguë, maire ja'nca guanseguë baji'i. ²⁴Ja'nca guanseguë ba'iguëna, maibi ba cocare achani te'e ruiñe yo'ojën, Riusu yëye'ru yo'oye ye'yejën ba'ë. Ja'nca ba'ijënna, ja'nrëbi baguë Raoja'guë Cristo hue'leguëbi maina ti'anni, yequë ma'are maini ëñobi. Yë'ë Cristo hue'leguëni si'a recoyo ro'tatoca, mësacua gu'a juchare saonì senjoni, Riusu

re'lo bainre mäsacuare re'huani bayë caguë, maini mame coca masi güesebi. 25 Ja'nca masi güeseqüëbi yuara maina ti'ansi'quë ba'iguëna, baguëni si'a recoyo ro'taye poreyë mai. Ja'nca ro'tatoca, ba guanse coca Moisesna jo'caguëna, maibi ja'an cocare gare se'e guaja yo'oye beoye ba'iyë.

26 Yureca, Jesucristoni si'a recoyo ro'tajën ba'itoca, Jesucristoni te'le zi'inni ba'ijën, Riusu mamacuareba re'huasi'cua ba'iyë mäsacua. 27 Jesucristoni recoyo te'le zi'inni, bautiza güeseni, baguë yëye se'gare yo'ojën ba'itoca, baguë ba'iyë'ru te'le ba'ijën, Riusu bainreba re'huasi'cua ba'iyë mai. 28 Ja'nca ba'ijën, tin yija bain ba'iyete, ëmëcua, romicua ba'iyete, ta'yejeiye ëja bain, ta'yejeiye beoye ba'icua ba'iyete, ja'an ba'iyete gare ëñañe beoye ba'icua'ë mai. Si'a jubë bain Jesucristoni si'a recoyo ro'tani Jesucristoni te'le zi'inni ba'ijënna, Riusubi maini ëñani, si'acuabi te'le ba'iyë caji. 29 Mäsacuabi Cristoni ja'nca te'le zi'inni ba'ijën, Abraham bain raija'cua cani jo'case'e'ru ba'ijën, Riusu mamacua re'huasi'cua ba'iyë. Riusu coca yo'oja'ye cani jo'case'e'ru mäsacua yua Jesucristo naconi te'le zi'inni Riusu bainreba ba'iyë.

4 1-2 Yureca, Riusu ye'yoyete quë'rë se'e ye'yeni masijë'ën caguë, ën cocare'ga mäsacuani quëayë yë'ë. Bonse ëjaguëbi baguë junni huesëja'yete ro'tani, Yë'ë bonse si'ayete yë'ë zinna jo'caza caguë, ba jo'cajai cocare toyani, ba uti toyase'ere baguë bainna insibi. Insini, ja'nrebi jë'te junni huesëguëna, baguë mamaquë yuta irani tējima'iguëbi baguë taita bonsere coní baye porema'iji. Baguë irani tējiiye tēca ëjoguëna, yequëcuabi ba bonsere re'huacaijën, taita guanseni jo'case'e'ru yo'ojën, ba zin hua'guëni guansejën yo'o con hua'guë'ru baguëte ëñajën cuirajën ba'iyë. Ja'nca ba'ijënna, ja'nrebi irani tējini, baguë taita bonse si'ayete coní baye poreji. 3 Riusu'ga maire güina'ru ëñaguë baji'i. Ru'ru, Moisés ira cocare maina jo'cani, Te'le ruiñe yo'ojën ba'ijë'ën guanseni, ën yija bain ëjacuare cuencueni, maini guansecaicuare re'huani jo'cabi. Zin hua'na te'le ruiñe yo'oye carajën ba'icuare maire ëñani, maire ja'nca guanse güesebi Riusu. 4 Ja'nca guanse güeseqüë, ja'nrebi baguë cuencuesirën ti'anguëna, baguë Zin Jesucristote maina raobi. Mai ba'iyë'ru ba'ija'guë caguë raoguëna, ën yija baingobi baguëte tē'ya raigona, baguë yua mai yo'ojën ba'ise'e'ru Moisés ira coca guanseni jo'case'ere achani yo'oguë baji'i. 5 Ja'nca yo'oguë ba'iguëbi maire ëñabi. Ba guanse cocare gare se'e guaja yo'oye beoye ba'ija'bë caguë, mai gu'a jucha yo'ojën ba'ise'e ro'ina junni tonbi. Ja'nca junni tonguëna, yureca maibi baguë naconi te'le zi'inni ba'ijën, baguë naconi Riusu mamacuareba re'huasi'cua ba'iyë.

6 Ja'nca re'huasi'cua ba'ijënna, Riusubi baguë Espíritute maina raobi. Raoguëna, baguë Zin Espíritubi mai recoñoa gaje meni baguë, yua maire bojo recoyo huanoñe re'huani, maini bojoreba güi güeseji: "Taita, yë'ë Taita" güijën bojoyë mai. 7 Riusu Espíritu bacuabi ja'nca bojojën ba'ijënna,

Riusubi ba guanse cocare maini gare se'le guaja yo'oye guansema'iji. Baguë mamacuare maire re'huani bani, si'a baguë bayete maina ro insini jo'caji.

Pablo se preocupa por los creyentes

⁸Yureca, mäsacua ja'anrë yo'ojën ba'ise'ere ro'tajë'n. Mäsacua yuta Riusu ba'iyete huesëcua ba'ijën, mäsacua huacha riusuñana gugurini rëinjën, mäsacua ira bain ba'isi'cua yo'ojën ba'ise'e'ru ba huacha riusuñana ro guaja yo'o conjën ba'nhuë. ⁹Ja'nca ba'isi'cuabi yureña Riusu ba'iyete te'le ruiñe ye'yeni masihuë. Riusubi baguë ba'iyete mäsacuani ëñoguëna, mäsacuabi baguë ba'iyete masihuë. Ja'nca masicuabi ¿guere yo'ojën, mai Taita Riusure ro jo'cani senjoni, mäsacua huacha riusuñani se'le gugurini rëiñe ro'taye'ne? Mäsacua ira bain ba'isi'cua yo'ojën ba'ise'e'ru se'le guaja yo'oye yëjën, mäsacuabi ro yo'oyë. Ja'nca yo'otoca, ba huacha riusuñabi mäsacuani cuirani coñe gare porema'iji. Mäsacuabi quë'rë se'le ai guaja yo'ocua ruiñë. ¹⁰Ja'nca ruinjën, mäsacua ira bain ba'isi'cua fiesta umuguseña yo'ojën ba'ise'e'ru ba ti'an umuguseña, si'a tëcahuëan jo'caye beoye yo'oñu cayë mäsacua. Ja'nca yo'oma'itoca, mäsacua yequë'rë huaji yëjën, Riusubi conma'iji cajën, ai guaja yo'ojën ba'iyë. ¹¹Ja'nca ba'ijëna, mäsacuare ai oiguë ro'tayë yë'ë. Mäsacuani Cristo ba'iyete quëani achoni consi'quëbi yequë'rë ro guaja yo'ohuë yë'ë.

¹²Yë'ë bain sanhuë, mäsacuani senreba señë yë'ë. Yë'ë ba'iyete ëñani, yë'ë ba'iyë'ru güina'ru ba'ijë'n. Bojo recoyo re'huani, guaja yo'oye beoye ba'ijën, Cristoni te'le zi'inni ba'ijë'n. Yë'ë yua Moisés ira coca guansese'ere guaja yo'oye gare jo'cani, mäsacua naconi te'le ba'iguë ti'ansi'quë sëani, yë'ë ba'iyë'ru güina'ru ba'ijë'n. Ja'nca mäsacuana ti'anni ba'iguëna, mäsacuabi yë'ëni bojoni, gare güeye beoye ba'ë'ë. ¹³Yë'ë mäsacuana ru'ru ti'anni ba'ise'ere ro'tajë'n. Rau neni ju'in hua'guë ba'isi'quëbi mäsacuana ti'añe bahuë yë'ë. Ti'anni ba'iguë, mäsacuani Cristo cocarebare quëani achoguëna, ¹⁴mäsacuabi yë'ë rau base'ere ëñañe porema'icua'ru ba'isi'cuata'an, mäsacuabi yë'ëre gu'aye ëñamaë'ë. Yë'ëre saoni senjomaë'ë. Banhuë. Mäsacuabi yë'ëre bojojën ëñani, mäsacua ba'iruna ti'an güeseni, Riusu anjeni re'oye ëñañe'ru yë'ëni re'oye ëñani bojojën, yë'ëre cuirahuë mäsacua. Cristo ba'iyë'ru ba'iyë yë'ëre ëñani, yë'ëni bojojën cuirahuë mäsacua. ¹⁵Yë'ëre ja'nca re'oye yo'osi'cuata'an, yureña mäsacuabi yë'ëre re'oye yo'oye ro'tama'ijëna, ai oi'yë yë'ë. Yë'ë ru'ru ti'anni ba'ise'ere ro'tato, mäsacuabi yë'ëni ai bojojën ba'ë'ë. Yë'ëbi sentoca, mäsacua baye si'ayete yë'ëna ro insire'ahuë. Poretoca, mäsacuabi mäsacua ñacore rutani, yë'ëna ro insire'ahuë. ¹⁶Ja'nca ba'isi'cuareta'an, yureña mäsacuani ëñato, yë'ëni je'o bacua'ru ëñoñë mäsacua. Mäsacuani te'le ruiñe ba'i cocare quëani achoguëna, yë'ëni gare se'le yëma'icua'ru ëñoñë mäsacua.

¹⁷Ja'nca ëñojëna, mësacuanî coqueye ye'yocuare caye bayë yë'ë. Bacuabi mësacua jubëna ti'anni, mësacuanî ro re'lo cocare canî achojën, mësacuanî re'oye yo'oye gare ro'tama'iñë. Ro re'lo cocare mësacuanî canî achojën, mësacua re'lo cocare bacuanî sa'ñëña caye ro'tajën, yë'ëre gu'aye cajën, yë'ëre jo'canî senjojë'n, mësacuanî yihuoyë bacua. ¹⁸Mësacuanî re'oye yo'oye ro'tacuabi mësacuanî re'lo coca catoca, bojoyë yë'ë. Yë'ëbi mësacua naconî beoguëbi ja'anre achatoca, bojoyë yë'ë. ¹⁹Ja'nca bojoguë ba'ïto, yureña yë'ë bain sanhuë, ja'ancua, mësacuanî coquejën cajëna, mësacua ba'iyete ai oiguë ëñañë yë'ë. Cristonî si'a recoyoreba ro'tajën, baguë yëye se'gare te'e ruiñe yo'oye ro'tajën, Cristo ba'iyë'ru güina'ru ba'iyë ëjojën ba'ijë'n caguë, mësacua ba'iyete ai oireba oiguë ëñañë yë'ë. ²⁰Mësacuabi yë'ë ye'yose'le'ru tin yo'ojëna, yë'ë yua mësacuanî cocare toyaguëbi mësacua naconî ba'ija'ma caguë, yë'ë yua gue ro'taye beoye caguë ë ba'iyë yë'ë. Mësacua naconî ba'iyë poretoca, mësacuanî quë'rë te'e ruiñe yihuoguë care'ahuë yë'ë.

El ejemplo de Agar y Sara

²¹Yureca, mësacuabi Moisés ira coca toyani jo'case'ere te'e ruiñe yo'oni Riusu bain ruiñe yëjëna, mësacuanî ñaca senreba senni achayë yë'ë: ¿Ba ira coca toyani jo'case'ere te'e ruiñe achani masiye mësacua? ²²Ja'an cocare ëñajën, Abraham yo'oguë ba'ise'ere masiyë mësacua. Samu zin hua'nani baguëña baguë. Ja'nca baguëbi ru'ru ba'iguëni ba yo'o con hua'go Agar hue'ego naconî baguëña. Yo'je raisi'quëni baguë rënjoreba Sara hue'ego naconî baguëña. ²³Ja'nca baguë, ru'ru raisi'quë, Ismael hue'eguëte cu'eto, Abraham se'gabi yo'oguë, Riusu coca canî jo'case'ere ro'tama'iguë, Zinni baza caguë, ba yo'o con hua'go naconî zin cu'ejaquëña. Yo'je raisi'quëca, Isaac hue'eguëte cu'eto, Riusu coca yo'oja'yete canî jo'case'ere ro'taguë, baguë rënjoreba naconî zin cu'ejaquëna, Riusu coca canî jo'case'le'ru ti'an raquëña baguë. ²⁴Ja'an cocare achani ro'tato, Riusubi mainî ñaca ye'yoye yëji: Ja'an romi hua'na tin ba'ijëna, Riusubi güina'ru samu coca tin cocare baguë bainni canî jo'cabi. Yequë cocare canî jo'cato, Sinai casi cubëte ba'iguë, ba ira cocare Moisesna canî, maina si'a jëja guanseye jo'cabi. Ja'an cocare ro'tato, Agar hue'ego ba'isi'co'ru ba'iji. Ai guaja yo'o consi'co ba'igona, bain hua'nabi ba ira guanseye cocare te'e ruiñe yo'oye yëto, ro guaja yo'oye bayë. ²⁵Bago mami Agare ro'tato, Arabe bain cocabi Sinai cubëte ro'tayë. Ai guaja yo'o consi'co ba'igona, judío bain yureña Jerusalén huë'e jobona sani, Riusuna gugurini rëinjën, bago ba'ise'le'ru güina'ru ba'iyë. Bago ro guaja yo'o congo ba'ise'le'ru ro guaja yo'ojën, Moisés ira guanseni jo'casi cocare yo'oye yëyë. ²⁶Yequë coca canî jo'case'ere ro'tato, Riusu coca yo'oja'yete Abrahamni canî jo'case'le ba'iji. Ja'an cocare si'a recoyo

ro'tacuabi yua Abraham rënjoreba Sara hue'ego ba'isi'co'ru güina'ru ba'iyë. Bainni ro guaja yo'o coñe beoye bacoña. Riusu bainreba casi'cua güina'ru ba'iyë. Baguë coca yo'oja'yete cani jo'case'ere si'a recoyo ro'tajën ba'icua sëani, Riusuni te'le zil'inni ba'ijën, baguë naconi baguë guënamë re'oto ba'i jobote si'arën ba'ijën, baguë mamacua casi'cua ba'ijën, gare carajeiye beoye ba'ija'cua ba'iyë mai. ²⁷Riusu cocare ëñajën, yeque quë'rore'ga ñaca masini, yë'ë yure case'ere ro'tajë'ën:

Yë'ë baingo garasi'co, zinre të'ya raiye porema'igo, gare ja'siye ai yo'oma'isi'co ba'igona, më'ëni ai ta'yejeiye bojo güeseja'guë'ë yë'ë. Ja'nca bojogo ba'ija'co sëani, si'a bainni quëani achogo bojogo ba'ijë'ën.

Më'ë të'ya raiye porema'ise'ebi yureña jo'cani senjosi'co ba'igota'an, jë'te ai jai jubë zin hua'nani bani ba'ija'go'co.

Ëñjëni bojogo ba'igo'ru quë'rë jai jubëni bani ba'ija'go'co, cani jo'case'e ba'iji.

²⁸Ja'an cocare ro'tajën ba'ijë'ën, yë'ë bain sanhuë. Mai hua'na yua Riusu bainreba ba'icua'ba baguë coca yo'oja'yete si'a recoyo ba'ijën, Riusu mamacua re'huasi'cua ba'iyë mai. Maire ja'nca re'huaguë, baguë coca yo'oja'yete cani jo'case'e'ru güinareba'ru yo'oji baguë. Abrahamni cocare cani jo'caguë, Më'ë yua zin hua'guëni baja'guë'ë cani jo'caguë, baguë coca case'e'ru güina'ru yo'oguë, Isaac hue'eguëte baguëna, insini jo'cabi. Ja'nca insini jo'caguë, maire'ga güina'ru baguë bayete insini jo'caji Riusu. ²⁹Yureca yeque cocare ro'tani ye'yejë'ën. Abraham se'gabi zinni baza caguë, Ismael hue'eguëni baguëna, ja'nrebi yo'je, Isaacbi ti'anguëna, Ismaelbi yua Isaacni ai je'o baguëna. Riusu Espíritu congüë jo'casi'quëni ai hui'ya yo'oguëna. Ja'nca yo'oguëna, yureña bain Moisés ira coca yo'oye ro'tacua, ja'ancua'ga maini güina'ru je'o bayë. ³⁰Ja'nca bajëna, Riusu coca Abrahamni cani jo'case'ere ro'tani ye'yejë'ën. Ñaca cani jo'cabi: “Ba hua'go Agar hue'ego, bago mamaquë Ismael, bacuare gare saoni senjojë'ën. Yo'o congo sëani, bago mamaquëbi më'ë bayete con baye gare porema'iji. Më'ë rënjoreba mamaquë ba'iguë, yë'ë insija'ye ba'iguë, Isaac hue'eguë, ja'anguë se'gabi më'ë bayete coni baja'guë'bi.” Ja'an coca toyani jo'case'ere ro'tani, coquejën ye'yocuabi më'sacuana ti'anjën, Moisés ira guanse cocare te'le ruiñe yo'ojën ba'ijë'ën cajëna, më'sacua yua gare coque güeseye beoye ba'ijë'ën. ³¹Yureca, yë'ë bain sanhuë, ja'an cocare më'sacuani yihuohuë yë'ë. Ja'nca yihuoguëna, ñaca te'le ruiñe ye'yejë'ën: Riusu re'o bain ba'iyë yëtoca, Moisés ira coca guanseni jo'case'ere yo'oye beoye gare ba'iyë mai. Riusu Raosi'quëreba Jesucristo hue'eguëni si'a recoyo ro'tasi'cuare sëani, Riusubi yua baguë re'o bainrebare maire re'huani maini baji. Ja'nca sëani, Cristo yëyete jo'caye beoye yo'ojën, bojojën ba'ijë'ën.

Firmes en la libertad

5 ¹Ja'nca baguëni si'a recoyo ro'tajëna, Cristobi gare se'e maini ro guaja yo'o güesema'iji. Baguë yëyete jo'caye beoye yo'ojën bojocua se'ga ba'iyë mai. Ja'nca ba'licua sëani, yequëcuabi ba cocare yo'oye guansetoca, gare se'e ro guaja yo'omajën ba'ijë'ën.

²Yureca, ñaca te'e ruiñereba achani ye'yejë'ën. Yequëcuabi mësacuani cajën, Moisés ira coca cani jo'case'ere yo'oñu cajën, mësacua go neño ga'nire tÿoye guansetoca, gare tÿo güeseye beoye ba'ijë'ën. Ja'nca tÿo güesetoca, Cristobi mësacuani gare coñe beoye ba'iji. ³Yë'ëbi yihuoguëna, te'e ruiñe achani ye'yejë'ën. Mësacuabi mësacua go neño ga'nire tÿo güesetoca, ja'nrebi Moisés ira coca guanseni jo'case'e si'ayerebare te'e ruiñe yo'oye bayë. ⁴Riusu re'o bain ruiñu cajën, ba ira cocare yo'o bi'ratoca, Cristo junni tonse'ebi mame re'huasi'cua ba'iyë gare porema'iñë. Riusubi mësacuani ëñani, baguë re'o bainre mësacuare gare re'huama'iji. ⁵Ja'nca ba'iyeta'an, maibi Riusu Espiritute bacua sëani, Riusu re'o bain re'huasi'cua ba'iyë mai. Ja'nca re'huasi'cuabi Riusu coca yo'oja'yete cani jo'case'ere si'a recoyo ro'tajën, Riusu in raí umuguse ti'añete jo'caye beoye ëjojën ba'iyë. Aito. Baguë naconi si'arën ba'ijën ba'ija'cua'ë mai, cajën ëjoyë. ⁶Cristobi maire mame re'huani baguëna, Riusubi maire ëñani, baguë re'o bainre maire re'huani, maini baji. Ja'nca sëani, bain go neño ga'ni tÿoyose'ere ëñama'iji Riusu. Jesucristoni si'a recoyo ro'tajën, baguë naconi sa'ñeña te'e yëreba yëjën ba'ijë'ën. Riusubi ja'anre ëñani, maini ai bojoji.

⁷Yureca, mësacuani si'a jëja senni achaye bayë yë'ë. Mësacuabi Cristo naconi te'e zi'inni ba'licuabi re'oye yo'ojën ba'isi'cuata'an, mësacua ÷queaca ro'tajën, tin cocare achajën, ba te'e ruiñe ba'í cocare ro jo'cani senjore'ne? ⁸Riusu yua mësacuani cuencueni, Cristo bain ba'iyë choisi'quëbi tin cocare achani yo'oye gare guanseye beoye baji'i. ⁹Ën cocare achani gare huanë yeye beoye ba'ijë'ën. Riusu cocareba case'e'ru choa ma'carë se'ga tin yo'o bi'ratoca, si'a jubëbi te'e jëana Cristoni ro'taye gare jo'cani senjoñë. ¹⁰Mësacuabi ja'nca jo'cani senjoñe ro'tacuareta'an, mësacua te'e ruiñe yo'ojën ba'ija'yete Riusuni señë yë'ë. Senguëna, mësacua tin coca yo'oyete mësacuani jo'cani senjo güeseji. Yë'ë yua baguë cocarebare mësacuani te'e ruiñe quëani achosi'quëbi mësacua te'e ruiñe achani yo'oyete jo'caye beoye ëjoyë yë'ë. Yequëcuabi mësacuani tin ye'yojënna, Riusubi bacuani ëñani, ëja bain ba'icuareta'an, bacuani bënni senjoñe se'ga ba'ija'guë'bi.

¹¹Yureca, yequëcuabi yë'ë ye'yoyete cajën, mësacua go neño ga'nire tÿo güesejë'ën caji, yë'ëre cajën ba'iyë. Ja'nca cajën ba'licuabi ro coqueyë. Bacua cayete gare achaye beoye ba'ijë'ën. Yë'ë yua ja'nca ye'yotoca, judío

bainbi yê'ëni je'lo bama'ire'ahuë. Ja'nca ye'yotoca, Cristo junni tonsi coca ye'yoye'ru tin ye'yore'ahuë yê'ë. Ja'nca tin ye'yotoca, judío bainbi yê'ëni bëinjën ëñama'ire'ahuë. ¹²Ja'nca coquejën, mësacuanî tin ye'yojën ti'ansi'cuabi cajën, mësacua go neño ga'nire tÿyo güesema'itoca, Riusubi bëinji, ja'anre hui'ya cajën ba'ijëna, Riusubi te'e jëana bacuanî bënni senjoja'guë cayë yê'ë.

¹³Ja'nca ye'yocuareta'an, gare achaye beoye ba'ijë'ën, yê'ë bain sanhuë. Riusubi mësacuanî choiguëna, mësacuabi baguë bainreba ba'iyë porejën, Cristo cocareba case'ru ro guaja yo'oye beoye te'e ruiñe yo'ojën, baguë naconi te'e ba'ijën bojoyë. Ja'nca ba'icuabi mësacua ëñare bajën, yê'ë yëye'ru si'aye yo'ozä cayë beoye ba'ijë'ën. Mësacua gu'a ëase'ere yo'oye yëtoca, gu'aji. Mësacua yëyete yo'oto, ru'ru sa'ñeña oire bajën, sa'ñeña yo'lo conjën ba'ijë'ën. ¹⁴Moisés ira coca toyani jo'case'ere ro'ta beoye ba'ijë'ën, yê'ë bainni ye'yejë'ën. Riusubi ja'an cocare baguë bainna jo'caguë, ñaca se'gare ro'taguë jo'cabi: “Mësacua ba'iyete ro'tajën ba'iyë'ru sa'ñeña oire bani ro'tajën ba'ijë'ën” canî jo'cabi. ¹⁵Baguë canî jo'case'ru güina'ru yo'oma'itoca, ro mësacua yëse'e se'gare yo'oye ro'tajën, airu hua'i hua'na yo'oye'ru, sa'ñeña huajën ba'iyë. Ja'nca sëani, mësacua ëñare bajën, sa'ñeña oire bani conjën ba'ijë'ën. Ja'nca ba'ima'itoca, mësacua yua Cristo beoye ba'ijë'ën, yê'ë bain naconi te'e zi'inni ba'iyete gare jo'cajën carajeyë.

Los deseos humanos y la vida por el Espíritu

¹⁶Mësacuanî ja'nca yihuo cocare caguë, ën cocare quë'rë ta'yejeiye yihuoguë ba'iyë yê'ë. Mësacua yo'ojën ba'iyete cato, Riusu Espíritu cayë se'gare yo'ojën ba'ijë'ën. Ro mësacua ro'tayete yo'oye beoye ba'ijë'ën. ¹⁷Ro mësacua yëse'ere yo'oye ro'tajën, Riusu Espíritu cayë'ru gare tin ro'tacua ba'iyë mësacua. Ën yija bain ro'tayete cato, Riusu Espíritu ro'taye'ru gare te'e ro'taye beoye ba'iyë. Ja'nca sëani, mësacua ba'iyete ro'tajën, ro yê'ë yëse'ere yo'oye beoye ba'iyë cajën, Riusu Espíritu cayë se'gare'ru yo'oye ro'tajën ba'ijë'ën. ¹⁸Ja'nca yo'oye ro'tajën, Riusu Espíritubi mësacuanî yo'lo güesetoca, Moisés ira coca canî jo'case'ru güina'ru yo'oyete gare se'e ro'tani yo'oye yëma'inë mësacua.

¹⁹Ën yija bain yo'oye ro'tayete cato, mësacuabi ja'anre re'oye masiyë. Ñaca yo'oye ro'tajën ba'iyë: Huejama'icuata'an, sa'ñeña yahue bajën a'ta yo'oyë. Bacua gu'a ga'nihuëbi ja'nca yo'ojën, Riusu cuencueni jo'case'ru tin yo'oye ro'tajën, Riusuni gu'aye yo'oyë. Ja'nca yo'ocuabi bacua gu'a ëase'ere yo'oye jo'caye gare porema'inë. ²⁰Riusu ba'iyete güejën, huacha riusu, ro bacua yëse'e se'ga, ja'anre yëjën ba'iyë. Te'e ruiñe masiza cajën, huati hua'i naconi coca senni achaye yëjën ba'iyë. Ën yija bain'ga sa'ñeña je'lo bayë yëjën, bëin cocare sa'ñeña cajën, Yê'ë yua quë'rë ta'yejeiguë

ba'iyë cajën, bacua bainre què'rë yo'je ba'licuare re'huani saoyë. Bacua huanoñe se'gare'ru yo'oye ro'tajën, sa'ñeña yo'o coñete gare jo'ca güeseyë. ²¹Yequëcua ba'iyete ai gu'aye cajën, bainre huani senjojën ba'iyë. Jo'cha äaji cajën, jo'chana güebejën, gue güihuara bojojën, bacua güebe gajecua naconi ganijën, ro bacua yëse'e'ru ja'nca yo'ojën gu'ajeyë. Mësacuanì ja'nca yo'oma'iñe yihuosi'quëbi yure mësacuanì se'e yihuoguë ba'iyë yë'ë. Ja'nca gu'aye yo'ojën ba'itoca, Riusu ta'yejeiye ba'iyete baguë bain naconi te'e baza cacuareta'an, Riusubi gare ënseji.

²²Mësacua yua ja'nca yo'oye beoye ba'ijën, Riusu Espíritu yo'o güeseyete yo'oye ro'tajën ba'ijë'ën. Ja'nca yo'ojën ba'itoca, yequëcua ba'iyete què'rë ro'tajën, bacuani oire bani coñe yëjën, Riusu yo'ore conjën ta'yejeiye bojojën, recoyo re'o huanoñe te'e ruiñe masijën ba'iyë. Mësacua yo'oye yëyete ro'tamajën, yequëcua ba'iyete què'rë ro'tajën, bacuani re'oye yo'oye conjën, mësacua bayete bacuana ro insijën, mësacua yo'oja'ye case'ere te'e ruiñe yo'ojën ba'iyë. ²³Yequëcuabi mësacuanì gu'aye yo'ocua'eta'an, bacuani re'oye yo'ojën, ro mësacua yëse'ere yo'oye jo'cajën ba'iyë. Riusu Espíritubi yo'o güeseguëna, mësacuabi ja'nca yo'ojën, Moisés ira coca toyani jo'case'e yo'oye'ru què'rë te'e ruiñe yo'ojën ba'iyë mësacua. ²⁴Jesucristoni si'a recoyo ro'tani baguë yo'ore te'e ruiñe coñe ro'tatoca, ro ën yija ba'iyete gare se'e ro'taye beoye ba'ijën, ro mësacua yëse'ere yo'oye gare se'e yëye beoye ba'iyë. ²⁵Yureca, mai yua Riusu Espíritu cayete te'e ruiñe yo'ojën, Espíritu yo'o güeseyete si'a bannì masì güeseñu cayë.

²⁶Ro mai yëse'ere gare ro'taye beoye ba'ijën, ro mai ba'iyete ta'yejeiye ëñoñe beoye ba'ijën, sa'ñeña gu'aye caye beoye ba'ijën, yequëcua què'rë re'oye ba'iyete ro ëa ëñañe beoye bañuni.

Ayúdense unos a otros

6 ¹Yureca, yë'ë bain sanhuë, mësacua bain jubë ba'licuare ba'iguëbi Riusuni gu'aye yo'otoca, mësacua Riusu Espírituni ye'yesi'cua yua ja'an bainguëni bojora'rë yihuojën, re'oye yo'oye baguëni bëiñe beoye masì güesejé'ën. Ja'nca masì güesejën, mësacua'ga ëñare bajën, güina'ru gu'aye yo'oma'iñe cajën ba'ijë'ën. ²Sa'ñeña ba'iyete jo'caye beoye ro'tajën, sa'ñeña conjën, gu'aye yo'oma'iñete si'a jëja yihuojën ba'ijë'ën. Ja'nca conjën ba'itoca, Cristo yëye'ru te'e ruiñe yo'ojën ba'iyë.

³Yequëcuabi ja'ansi'cua ba'iyete ro'tajën, Riusuni gare gu'aye yo'oma'iguë'lë yë'ë cajëna, mësacua yua ja'nca ta'yejeiye camajën ba'ijë'ën. Ja'nca catoca, te'e ruiñe cama'iñë. ⁴Mësacua yo'ojën ba'iyete ëñajën, Riusu cocareba canì jo'case'ere te'e ruiñe ro'tajën, Riusu ëñañe'ru mësacua ba'iyete ëñajën ba'ijë'ën. Ja'nca ëñajën, mësacuabi re'oye yo'ojën ba'itoca, Riusuni surupa cajën bojojën ba'ijë'ën. Mësacua bain yo'oye'ru

què'rè re'oye yo'ojèn ba'itoca, ta'yejeiye camajèn ba'ijè'ën. ⁵Riusu se'gabi mèsacua yo'ojèn ba'ise'ere èñani bojotoca, re'oye ro'tajèn bojojè'ën. Riusubi èñani bojoma'itoca, mèsacua se'gabi mèsacua recoyo yo'oyete baguèni te'e ruiñe senni achajèn, baguè coñe se'gare ro'tajè'ën.

⁶Mèsacuabi Riusu cocarebare ye'yejèn, yequèbi masiye ye'yoguèna, ba ye'yoguèni re'oye ro'ijèn, baguèni re'oye bojo güesejè'ën.

⁷Yureca, gare coque güeseye beoye ba'ijè'ën. Riusu yèye'ru tin yo'otoca, baguè bënni senjoja'ñete jèaye gare porema'iñè. Riusubi si'a bain yo'ojèn ba'iyete èñani, ga bainguèni yo'oja'yete cuencueni re'huacaiji.

⁸Mèsacuabi yua ro mèsacua yèse'e se'gare yo'ojèn ba'itoca, mèsacuabi ro sa'ntijèn, bënni senjosi'cua ba'ija'cua'è. Mèsacuabi Riusu Espíritu yèye se'gare yo'ojèn ba'itoca, mèsacua ai bojoreba bojo recoyo huanóne ba'ijèn, Riusu naconi si'arèn ba'ijèn, gare junni huesèye beoye ba'ija'cua'è.

⁹Ja'nca ba'ija'cua sèani, ai yo'ojèn ba'ito'ga, Riusu Espíritu yo'o caye se'gare jo'caye beoye te'e ruiñe yo'ojèn ba'ijè'ën. Ja'an yo'ore jo'caye beoye yo'ojèn ba'itoca, Riusu cuencuesirèn ti'anguèna, Riusubi maini ai ta'yejeiyereba bojo güeseja'guè'bi. ¹⁰Ja'nca sèani, mai porese'e'ru si'a bainni re'oye yo'ojèn bañuni. Cristo bainreba, mai jubère concua, ja'ancuare què'rè ta'yejeiye re'oye yo'ojèn bañuni cayè yè'è.

Advertencias y saludos finales

¹¹Yureca, mèsacuani despídie bi'raguè, yè'è se'gabi mèsacuani cocare yihuoguè toyayè. Yè'è jai letra toyase'ere èñani, yè'è toyase'ere masijè'ën. ¹²Ba coquejèn ye'yocuabi mèsacuana ti'anjèn, bainbi maire re'oye èñajèn ba'ija'bè cajèn, mèsacuani go neño ga'nire tèyo güeseye ro'tayè. Cristo junni tonse'ebi tèani baja'yete quèani achocuareta'an, judío èja bainbi bacuani je'o bama'iñe cajèn, mèsacua go neño ga'nire tèyo güeseye ro'tayè. ¹³Bainni ja'nca tèyo güeseye ro'tacuabi Moisés ira coca toyani jo'case'ere yo'oye ro'tama'iñè. Mèsacua tèyo güeseja'yete èñajèn, Mèsacuani ai re'oye yo'o conhuè cajèn, ja'anre ai ta'yejeiye cani achoye ro'tajèn ba'iyè bacua. ¹⁴Ja'nca ta'yejeiye cani achocuata'an, yè'èca Jesucristo yo'oguè ba'ise'e se'gare ta'yejeiye cani achoye ro'taguè ba'iyè yè'è. Baguèbi crusu sa'cahuèna junni tonguèna, Riusu bainreba ba'iyè poreyè mai. Ja'nca cani achoye ro'taguè sèani, èn yija ba'iyete ye'yesicua yo'ojèn ba'iyè'ru gare yo'oye yèma'iguè ba'iyè yè'è. Bacua yèse'e'ru yo'oye, bacua se'gare'ru huanóne ba'iyè, ja'anre gare yèma'iguè ba'iyè yè'è. ¹⁵Ja'nca ba'iguèbi bain go neño ga'ni tèyose'ere cato, èmèje'en yo'ose'e se'ga ba'iguèna, ta'yejeiye ro'tama'iñè yè'è. Bain recoyo mame re'huase'ere cato, sa'nahuè yo'ose'e ba'iguèna, ai ta'yejeiye ro'tayè yè'è. ¹⁶Riusubi mame recoyo re'huaguèna, bacua ja'anrè yo'ojèn ba'ise'ere gare jo'cani, Espíritu yèye'ru te'e ruiñe yo'ojèn ba'icua'ere cu'eguè, baguè

bainre bacuare re'huani baguë, bacuare ai re'oye conguë, bacuani ai bojo güeseji. Yequëcua, Espíritu yëye'ru yo'oye güecuabi, Israel bainguë sëani Riusu re'o bainguë'ë yë'ë cajën ba'icua, ja'ancuare cu'ema'iji Riusu.

¹⁷Yureca, yë'ë yihuo cocare cani tējihuë yë'ë. Yequëcuabi yë'ëre cajën, Cristo cuencuesi'quë beoji baguë, yë'ëre cajënna, bacuabi rani, yë'ë ja'si nesiruanre ëñaja'bë. Jesucristo yo'ore conguëna, yequëcuabi yë'ëni huaë'ë. Ja'nca sëani, Jesucristoni te'e ruiñe yo'o conguë ba'iyë yë'ë.

¹⁸Yureca, yë'ë bain sanhuë, mai Ējaguë Jesucristoni mësacutare senni achaguë, mësacuani recoyo te'e zi'inni ba'iguë, mësacuani bojo güeseja'guë cayë yë'ë. Ja'nca raë'ë. Amén.